



## Lied vo dr Jasägerarmee

**Text/Melodie/Gesang: Hans Jürg Zingg**

**Begleitung: Roland Scherrer (Klavier), Christian Schwander  
(Rhythmusinstrument, Hackbrett)**

aber wen i nid cha nei säge zu deren armee  
chan i ou nid ja säge zu deren armee  
blybt mer nume ds chopfschüttlen über di armee  
nume spott u wuet

we me zu dene wo nei säge zu deren armee  
nid äntlech cha ja sägen i deren armee  
het vermuetlech angscht men i deren armee  
vor lüt mit muet

wiu eis isch klar: nei z säge zu deren armee  
bruucht hütt vil me als ja z säge zu deren armee  
tuet däm wo nei seit me weh weder dr armee  
sys neisäge tuet

drum isch ds perversen a deren armee  
beschämend u truurig u nid z überseh  
s bruucht nüt für ja z säge zu deren armee  
weder geischt no muet

was das für fuge cha ha für nen armee  
chasch zum byschpiu gseh bim ne defilee  
da joggle tuusig toggle wi ne maschine  
vrby am ne huet

chiemts aber mal drufa uf üsy armee  
müesst ou ig ysta für üsy armee  
mit allem won i ha für üsy armee  
ou mit mym bluet

drum bin i nid so sicher öb die wo nid wei gse  
dass men ou chönnt nei säge zu deren armee  
würklech wüsse was ds *ja* zu deren armee  
bedüte tuet

i gloube nämlech *ja* z säge zun eren armee  
chönnt öppis ztue ha mit eren idee  
vo solidarität fride freiheit u demokratie

doch grad die wo finde fride chönnt no öppis me sy  
als me sech das vorstellt bin eren armee  
wo ihri neisäger kriminalisiert  
grad die wärde gschtuucht

hingäge wär z feig isch sy angscht vor däm la z gse  
won im einisch chönnt blüeje bi deren armee  
dä chöi si bruuche bi deren armee  
grad die wärde bbruucht

chönnt men äntlech itz ou nei säge zu deren armee  
fragti sich sicher me ja das chönntet dir de gse  
werum si hei *ja* gseit zu deren armee  
u das tät guet

(1984)